

續

藏

書

續藏書卷六目錄

遜國名臣

景清

茅大芳

陳性善

胡閏

劉端

王高

鄒瑾

彭與明

盧原質

薛嵩

廖昇

周是修

王叔英

附 盛希年

王良

董倫

王景

唐愚士

高遜志

張顯宗

附 楊璉 房安 呂昇

樓璉

王達

高巍

宋徵

劉伯完

黃鉞

附 楊福

龔太

韓永

陳繼之

戴德彝

韓郁

魯鳳韶

王彬

董鏞

葉希賢

魏冕

甘霖

王度

鄭公智

尹昌隆

巨敬

王良

程本立

附 沈壽康

胡子義

林嘉猷

鄭居貞

續藏書卷六目錄終

續藏書卷六

遜國名臣

御史大夫景公

景清，陝西真寧人。洪武二十七年，進士第二人。初領鄉薦，遊國學，同舍生有秘書，清請之，不肯與。清固請，請以明日即還，而書生且往索書。清曰：吾不知何書，吾不假書于汝。生忿怒，訟之。祭酒清即持書往見祭酒，曰：此清所誦書，即誦書徹卷，問生：生不能誦一詞，祭酒叱生，生退。清即以書還生，曰：吾以子珍秘太甚。



故相戲耳。清初赴舉時，過宿淳化主家。主家有女，爲妖所憑。是夜清在，而妖不來。女詰之曰：「吾避景秀才清也。」女以告父，父追及清，語之。清書景清在此四字，令歸粘其門，妖遂絕。清試禮部第三，錄詩書二經入翰林。三載，改監察御史。三十年春，召見，嘉其才，命署都察院左僉都御史，與實俸，出川陝巡察私茶。建文卽位，擢左都御史，改御史大夫。文皇繼統，方孝孺、練子寧等都死，而清獨委蛇侍朝。人以其素頗疑之。一日早朝，清緋衣入，先是星者奏文曲犯帝座甚

急。文皇已疑清，及朝，清獨著緋，遂收清，得所帶劍，不屈而歿。是夕，精靈迭見，族其家，已而時入殿庭，爲厲。又命籍其鄉，轉相攀染，謂之瓜蔓抄。村里爲墟。

都御史茅公

都御史茅大芳，太興人，博學能詩文，少有奇名。或贈之詩曰：陸機此日能爲賦，賈誼何時復著書。洪武中，儒士應辟，典教淮南，考績入朝。高廟召對，悅之，擢秦府長史，勉以董子輔相之業，賜賚甚厚。大芳感激，額其堂曰：希董方孝孺爲記。稱大芳志意偉然，敦大和雅，不亢不諂。建文卽位，擢右副都御史，靖難兵起，遺詩淮南守將梅殷曰：幽燕消息近如何，聞道將軍志不磨。縱有火龍翻地軸，莫教鐵騎過天河。關中

事業蕭丞相、塞上功勳馬伏波、老我不才無補報、西  
風一度一悲歌、建文四年八月死、子順童道壽文生  
並論死、三孫添孫歸生死獄中、有希董集五卷、行于  
世、

都御史陳公

陳性善名復初以字行山陰人洪武十八年進士  
上見性善凝重謂侍臣曰性善君子人授行人司副  
入翰林爲檢討初誠意伯劉基卒命李鐸往取其  
遺書基子璉卽出觀象玩占石室中書從鐸詣闕  
上之性善善楷書召入便殿繙錄上威嚴進見者  
惶汗手顫不成字唯性善動止安雅書法端正上  
悅賜性善酒是時威譴叵測性善留竟日家人以爲  
歿矣比出大驚喜久之超陞禮部左侍郎薦薛正言

輩雲南布政使韓宜可隸謫籍性善薦起爲副都御史皇太孫在東宮時熟聞性善名及卽位獨召性善賜坐問治天下之要性善所言悉從然施行未竟輒爲有司所更性善請見曰陛下不以臣愚猥承顧問臣旣僭塵上聽許臣必行未幾輒改所謂爲法自戾何以信天下靖難兵起改性善爲副都御史監軍建文四年三月辛巳戰靈璧敗績與彭與明劉伯完王資皆被執文皇縱之歸性善衣朝服躍入河歿後加追戮家徙邊已而赦還

大理少卿胡公

胡閏字松友，鄱陽人。博學修行。高皇征陳友諒，至鄱陽，吳芮祠見壁間題竹，幽人無俗懷，寫此蒼龍骨。九天風雨來，飛騰作靈物。高皇問祠中人，此誰詩。對曰：里中儒生胡閏，立召閏見，置帳前。久之，官督府經歷。建文中，以直諫知名，遷右補闕。尋進大理少卿。靖難兵起，數與齊黃議軍國事。壬午七月，不屈歿。籍其家，子傳道論歿。傳慶謫戍邊，一女得釋歸，貧甚無倚。鄉人競遺錢穀，曰：此忠臣女也。旬日饒足。嘉靖初。

提學副使邵銳祠之學宮



大理丞劉公王公

大理寺丞劉端，南昌人。建文二年進士，驟遷大理寺丞。靖難後，與同邑王高並坐縱方孝孺息樹陰，劓鼻而終。高與端同年進士，又與端同官。

右二賢皆是並坐縱方孝孺息樹陰，劓鼻而終者，又是一樣歿也。

大理寺丞鄒公

鄒瑾吉安永豐人。洪武二十七年，遇金華王紳，紳稱瑾志篤才敏，議論磊落可嘉，忠義人也。洪武末薦至京，建文二年爲大理右寺丞，靖難後不屈，歿。

大理寺丞彭公

彭與明萬安人貢入太學洪武二十五年授兵科給事中陞刑部浙江司員外郎建文元年陞湖廣按察僉事尋陞大理右寺丞與明廉勤律已剛毅敢言敏達能斷四年擇中朝官知兵有風裁者出江北督察諸將與明爲衆所推遂出淮西至靈璧會何福戰敗爲北兵所執文皇遣歸令傳語中朝士與明慚憤裂冠裳棄官變姓名而隱不知所終

太常少卿盧公

盧原質字希魯，浙江寧海人。洪武二十一年進士第。三人授翰林編修，孝孺遺原質詩曰：奉天殿上榜初開，共賀江南得異才。好與青蘿居士說，今年文運屬天台。二十三年丁外艱，賜傳奔喪。二十八年陞太常少卿，事建文，累有建白，靖難後召見，不屈，歿。族其家。

大理少卿薛公

薛崑閔鄉人有口辯建文三年以鎮江知府爲大理左少卿是年方孝孺建議草詔令崑賫至北平又作宣諭數千言刊印千紙付崑令密散北兵諸將士崑見成祖曰上言殿下且釋甲謁孝陵暮卽旋師成祖叱曰事至此尚誰欺左右請殺崑成祖曰天子命使也釋之歸靖難後免崑死謫廣西

太常少卿廖公

廖昇，湖廣襄陽人，不知其所以進學，行最知名。與方孝孺、王紳輩友善。洪武中，爲左府斷事。上知其賢，二十九年六月，擢太常少卿。建文元年正月，勅修高廟實錄。昇博雅，有史才，朗達，負氣，書靖難兵事，語多據實。聞忠誠伯等自龍潭還，慟哭，與家人訣，自縊。死，都御史陳瑛奏昇與黃觀、王叔英、周是修、王良顏、伯瑋皆不順天命，效死建文，計其存心，與叛逆等並宜追戮。上詔勿問。

衡府紀善周公

周是修名德以字行江西泰和人少孤力學舉明經爲霍丘學訓導入見太祖問家居何爲對曰教人子弟孝弟力田太祖喜擢周府奉祀正逾年從王北征至黑山還陞紀善建文元年王有過盡逮府吏詔獄是修以嘗諫勸得免改衡府紀善衡府者建文之弟當是時衡王猶未之國是修留京預修纂翰林好薦達知名士陳說國家大計及指斥用事者誤國用事者怒共挫折之是修屹不爲動靖難師渡江

宮中自焚是修留書其家別友人江仲隆解縉胡靖

蕭用道楊士奇付以後事暮入應天府學自經死死

府學今在祠祀公

年四十九 文皇繼統都御史陳瑛言是修不順天

命請加追戮 上曰彼食其祿自盡其心勿問是修

常曰忠臣不以得失為憂故其言無不直烈女不以

死生為慮故其行無不果因取先代及近世忠節遺

事輯為觀感錄朝夕省覽

李禿翁曰周先生猶勝王先生良多



翰林修撰王公

翰林修撰王叔英字原采台州黃巖人洪武二十年薦起爲仙居訓導三十年改海安府學陞漢陽知縣有惠政嘗遇旱虔禱不效遂絕食天大雨復祈晴遂霽建文初方孝孺欲復古井田叔英貽書力阻之曰凡人有才固難能用其才者尤難子房之於漢高能用其才者也賈誼之於漢文不能用其才者也方今明良相值千載一時但天下之事固有行于古而亦可行于今者如夏時周冕之類是也亦有行于古而

難行于今者，如井田封建之類是也。可行者行，則人之從之也易；難行而行，則人之從之也難。從之易，則民樂其利；從之難，則民受其患。此君子之用世，貴得時措之宜也。召爲翰林，修撰靖難兵至淮上。建文遣使四出募兵，叔英奉詔行至廣德間。上已遜位，卽慟哭。會齊泰奔，叔英曰：「泰貳心矣，急擒泰至，密問之，乃相抱哭，相語共圖再舉。已而知不可爲，乃沐浴衣冠，書絕命詞，藏衣裾間，自經于玄妙觀銀杏樹下。詞末有千秋史官筆，慎勿稱希賢之句，又題其案曰：

生既久矣，未有補于當時，歿亦徒然，庶無慚于後世。妻金安人，繫獄歿，二女赴井歿，祠山道士盛希年收葬。叔英于本州城西五里之地，正統中楊士奇題曰：嗚呼翰林修撰王原采墓，士奇叔英所薦起也。成化中州守莆田周瑛封植表識之。嘉靖中鄒守益謫爲州判官，立祠奉祀。太平知縣魯才漢又建忠節祠祀叔英，妻并二女，又有貞烈祠在黃淡畧上。

翰林修撰王公

王良字敬止吉水人建文元年江西發解第一明年  
舉禮部廷試策最優以貌不揚易胡靖第一良第二  
李貫第三並授翰林修撰如洪武十八年故事良初  
聞靖難兵起輒憂不食日羸憊及渡淮閉門涕泣不  
已訣妻子服毒歿建文哀其忠遣禮部侍中黃觀  
諭祭永樂初上出建文時羣臣封事千餘通令解  
縉等編閱留軍馬錢糧數盡焚諸言語干犯者因從  
容問貫縉等曰爾等宜皆有之衆未對貫獨頓首曰

臣貫實未嘗有也。上曰：爾以是爲美邪？食其祿，思任其事，當國家有事時，官近侍，獨無一言可乎？朕非惡夫盡心于建文者，惡導誘建文壞法亂政耳。爾等前日事彼，則忠于彼；今日事朕，當忠于朕，不必曲自遮蔽也。後貫遷中允，坐累繫獄十年，竟歿獄中。貫亦吉水人。

侍郎學士董公

董倫字安常、恩縣人、僑居宛平、質直有文學、從游者稱爲貝川先生、國初擢用單縣儒士張寧、寧薦倫、洪武十五年、遣使徵爲右贊善、事懿文太子十八年、擢左春坊大學士、太子卒、出爲河南左叅政、上封事數千言、又薦肇州吏目諸葛伯衡、上擢伯衡陝西右叅議、三十年、誣誤免官、典教滇南、建文在東宮、憐其老、且遠去、賜白金若干鎰、及卽位、召拜禮部侍郎、兼翰林學士、賜御書怡老堂扁、及鬆儿、玉鳩

杖各一。倫上表謝。畧曰：桓榮設几杖於太常，不聞宸翰之賜，晏殊題舊學于神道，未見几杖之頒。自今將杖以戒，噎則當思四海，或有饑餒之民，憑几以安身，則當念一物，或有顛連之嘆，或曰：此孝孺代筆也。時解縉謫河州衛吏，與倫書祈援。倫左右縉得召還，爲待詔。倫爲人質直敦厚，建文間，屢懇言宜親睦宗人，不聽。靖難後，倫年八十餘，令致仕，出京悒悒成疾，數日卒。

董倫、王景皆從雲南謫籍而起，至于六卿長貳，爲

朝廷侍從左右親密近臣者也。建文真若主矣。今王景不歿，董倫至勒令致仕，乃怏怏歿，是均之不歿也。夫歿豈人所欲哉！然居此地，到此時，安有不歿之理也。建文二年，廷試一榜，胡廣第一，親改名靖，其二王良以貌嫌，似于建文，未爲知己，反烈而歿如此，可敬也。夫若第三名李貫，曷足道哉！今董倫、王景等，吾若擠之，使與李貫等並，則有人品，有文學，實亦非其等夷。或曰：此列建文時諸名臣書也，何必以歿爲重乎？若專重歿節，則直曰遜。



國忠臣可矣。何以曰遜國名臣也。卓吾子曰。予因惡夫爲李貫者。幾錯會了。鄭端簡公一場主意。

侍郎學士王公

王景字景彰，松陽人。洪武初，起家懷遠教諭，歷知州。山西叅政，謫雲南。建文召景爲知縣，留與修高廟實錄。母憂去，服闋，吏部尚書張統爲雲南布政使，時知景薦陞禮部右侍郎，兼翰林侍講，充總裁官。靖難後，進學士。時言建文崩，上問景葬禮，景頓首言宜用天子禮。上從之。景博學，能文章，善書。

翰林侍講唐公

唐愚士名之淳，以字行，山陰人。建文二年，勅翰林侍從之臣方孝孺等集數千載經史中事爲一書，又命舉優通文學之士。孝孺首薦愚士。愚士時寓金陵，爲李景隆子師立召爲翰林侍讀，賜冠帶，令與孝孺俱領修書事。進講前漢書，愚士父肅仕。國初應奉翰林文字，以故愚士得遍游公卿間。宋濂稱其文迥肅，謫歿臨濠。愚士奉喪歸葬，求父遺文，雖荒郵敗壁，高崖斷石，靡不纂錄。什襲時時伏讀，聲甚淒切。聞者

通國名目 卷六  
皆掩涕。愚士長身巨鼻，博聞多識，爲文蔚瞻，尤長于詩翰。洪武中，數從景隆徧游燕薊秦周，所過廢都舊邑，名賢古帝遺跡，輒爲詩歌論記。性喜飲酒，酒酣高談傾坐，晚得官近侍，未幾病，病愈復起，明年病甚，比卒，遺言請銘孝孺。愚士貧，無他宗族喪事，數千百緡倚辦。景隆孝孺爲聞，上詔有司給舟歸葬。

少卿學士高八

高遜志字士敏，蕭縣人。元末僑寓嘉興，好問學，嘗侍父宦遊吳中，受業宣城貢師大都湯周伯琦，遂昌鄭元佑爲文深純典雅，成一家言。年二十五爲鄞山書院山長。洪武二年徵修元史，入翰林爲編修，累遷侍讀學士。建文時遷太常右少卿，兼學士。庚辰會試，與董倫爲考試官。所舉士胡靖、吳溥、楊子榮、楊溥、胡濬輩，靖難後皆爲名臣。遜志存沒不可考。是科同預較藝者，右拾遺朱逢吉、編修史官吳勤、葉惠仲、趙友士、徐

旭張秉彝監試御史王度俞士吉皆一時之選惟惠  
仲王度歿難餘皆位如故

國子祭酒張公

張顯宗字明遠，汀州寧化人。少喪父，母黃守志訓教。顯宗以文學著名。洪武二十四年進士及第。第二十九年，以編修陞太常寺丞。賜衣一襲。三十年，署國子祭酒事。建文卽位，爲真上便宜數事。學政一新。壬午正月，陞工部右侍郎。靖難兵至淮，顯宗奉詔起義兵。江西募民出粟給軍餉。六月還，復爲祭酒。靖難後，江西兵執顯宗及布政使楊璉，按察使房安僉事呂昇至南京。謫顯宗等戍興州。後平交趾，起顯宗爲左

布政使勞來撫戢夷民安附永樂七年卒于官顯宗  
性行孝友政事敏達時以文學備吏事會交趾初平  
人情未定清林知州王賦武寧知州魏思善能奉行  
顯宗約束皆有惠政並卒于官



翰林侍講樓公

樓璉字士連，金華人。常從宋濂學。洪武中以儒士召，歷官至監察御史。謫戍雲南，建文嗣位，屢下詔求賢。璉以文學舉入翰林，爲侍讀。靖難兵入，命方孝孺草詔，孝孺哭且罵，授之筆，擲諸地，曰：「身可死，詔不可。」草改命璉及王景璉，惶懼不敢辭，歸而憤悶，妻子曰：「得無傷方先生邪？」璉愧曰：「我受刑猶可，正恐累及爾輩耳。」遂巡一夕自經死。

侍講學士王公

王達字達善無錫人洪武間爲大同訓導過北平私  
上謁成祖成祖喜禮達建文末薦陞國子教職靖  
難後姚廣孝又薦達陞翰林編修再陞侍講學士達  
謙和恭慎能詩文上嘗問達建文君事對曰建文  
君亦可與爲善顧輔導非人耳上終薄達一日達  
侍問達十難字達識其八上曰朕更有難字難汝  
達懼服銀屑灰上顧憐之命有司歸其喪或曰  
達草靖難登極詔或曰草詔者括蒼王景學士也

叅軍斷事高公

高巍山西遼州人。洪武十五年應貢入太學。十七年以孝行旌授前軍都督府左斷事。建文卽位知州王欽應詔辟巍赴銓曹。上書論政事。其一曰。太祖有文王純一之德。皇后有后妃不妬之行。百男君王。上齊三代分茅胙土。先據形勢。陝西百二山河。其人悍勇。西隣土番。故以藩王之長。秦府王之山西。表裏山河。地產良馬。其人剛壯。所謂山西將者是也。北近胡虜。故以晉府王之。燕國雖無名山大川之限。其

南冀州真保順平大名諸府所謂桑土之野地里坦  
平肥沃供賦饒衍北雖沙漠不毛廣蓄馬羊其人不  
耕不蠶皮衣肉食弓馬是務遼金殘元藉之興業故  
以燕府王之四川雖曰西南一隅山河阻深玄德  
諸葛虎視吳魏故以蜀府王之其餘楚湘齊兗寧遼  
谷代慶肅星羅碁布比之古制雖皆分封適當然  
太祖聖意莫不欲護中國而屏四夷也今各處親王  
故多驕逸不法此我皇上所難處也以臣愚見若  
賢如河間東平則下詔褒賞之其或驕逸不法如淮

南濟北初犯則容之再犯則赦之三犯而不改然後  
○漢之古史果 用之可也然其情難之六天  
合親王告太廟削其地而廢處之豈有不順服者  
哉修身齊家宣父明訓睦族和邦帝堯盛德惟皇  
上覽察焉建文大奇魏會靖難兵起命從李景隆出  
師叅贊軍務魏復上書言臣願使燕披忠膽大陳義  
禮曉以禍福遂遣往燕魏自稱國朝處士臣某上書  
燕國大王其詞云云不報景隆兵敗魏自拔南歸建  
文二年五月遇鐵鉉于臨邑相持慟哭共誓效死遂  
趨濟南守城拒退靖難兵魏作賦志喜有曰至濟南

而被圍。思張巡之忠堅，幸遇知已之鐵相，更從英輩以雲聯。若徐將軍之赴赴，盛統兵之桓桓，僉憲高公之糾謾，大叅宋公之周旋，掠陣張都統之能勇，給儲王太守之從權，吾道府校之論議，斯文王肯構之勉旃，衆資羣策，屈力保全，盛統兵者，盛庸也。餘不可考矣。京城破，魏縊歿，驛舍又有高不危者，仕建文時，歿義弟宣，戍南海衛，或曰不危，魏字也。

李贄曰：當時曷不以齊黃之任，任高不危，以李景隆之任，任鐵相等乎？

經歷宋公監副劉公

宗人經歷宋徵不知何許人嘗與盧振謝昇牛景先數言耿曹諸將失律懷貳心靖難後縛至不屈死并殺其妻子

欽天監副劉伯完不知何許人洪武時重天官之學稍通歷象占步風角者咸得衣食于官凡有征討必選通知天文者從行伯完精於占候又諳回回曆法起疇人歷官欽天監副靖難兵南下在歷城戾軍中從何福戰靈璧敗績被獲釋還竟亡去莫知所終

給事中黃公

禮科給事黃鉞字叔揚常熟人以生員薦除湖廣宜  
章縣典史建文元年舉湖廣鄉試明年進士授刑科  
給事中陞戶科左改禮科建文三年外艱方孝孺屏  
左右問曰北兵日南蕪常鎮京師左輔君吳人朝  
廷近臣今雖去宜有以教我鉞曰三郡唯鎮江最要  
害守非其人不可鎮江指揮童俊狡猾不可測蘇州  
知府姚善忠憤激烈有國士風但仁慈有餘御下太  
寬此治郡之良才恐不足定亂然國家大勢不在江



南戎馬至此而禦之晚矣。孝孺因附書于善。善得書  
慟哭。靖難兵至江上。善受詔。總蘇松常鎮嘉興五  
郡兵勤王。以書招鉞。鉞卽日營葬訖。遂趣善所。時童  
俊果以鎮江降。靖難後。詔暴善罪。捕善急。善麾下  
許百戶素親善。縛善去。邀賞鉞。聞之。慟哭。遂絕食。閉  
目三日求死。或告鉞曰。善歎服已得宥。鉞膛目曰。吾  
知善決無二心。且少俟。善事定。吾死未晚。脫善果不  
死。吾將下報。希直遂復稍稍食。是年七月十一日。善  
死。報至。鉞起登琴川橋。西向再拜。祀善。哭曰。君今與

希直同歿國，吾忍獨生乎？祀畢，給家人歸祭具，從容  
整衣冠，奮身入水。歿時，北兵四出捕善黨，籍籍言且  
併錄鉞家親族，悉驚伏。鉞友人楊福具棺衾，日夜泣  
橋側，義上百方求鉞屍，不得，更數日，屍忽自出，立水中。福  
大哭，抱起，易衣，體猶不潰，竟成禮葬之。福父濠，早奇  
鉞，鉞與福共學，福亦有古行。

李禿翁曰：卽此便見楊福古行矣，不必言福亦有  
古行也。此何時也？動卽誅歿，見卽綁縛請賞，至親  
皆避匿，恐後福獨哭立水傍，卒以禮從容殯葬，其

屍此實黃黃門一類人全不以死爲念者使方正  
學早知而用之安至今日觀黃黃門與正學對面  
數語具見才識可以大用

給事中龔公韓公陳公

都給事中龔太，字叔安，浙江義烏人。洪武十九年，鄉薦。明年入太學，吏部策試第一，除戶科試給事中。建文三年，遷都給事中。文皇渡江，太與妻傅訣曰：「事至此，我自分死，爾第携幼稚歸，否則俱溺井，無辱。」俄宮中火起，太馳赴爲兵校所執，見文皇金川門，以非奸籍得釋。太自投城以死。年三十六。子永吉，累官兵部右侍郎，改南京大理卿，致仕。

戶科給事中韓永，陝西西安人。或曰浮山人。豐軀美

髯音吐宏朗每慷慨論兵建文喜之靖難後杜門不出召入見不屈死

戶科給事中陳繼之福建莆田人建文二年進士靖難兵起建白多不遜靖難兵入城遂死父秀母黃氏謫戍甘肅道死子徵仔妻姚氏女進奴京奴没入官弟余朔等悉遠戍

左拾遺戴公

戴德彛、奉化人。洪武二十七年進士第三人。初爲翰林編修。三十年與張信並陞侍讀。上諭曰：汝爲侍臣，凡國家政治得失、生民利病，當知無不言。昔唐陸贄、崔羣、李絳在翰林，皆能正言讜論，補益當時。建文中改左拾遺。靖難兵起，與方黃畫兵事。靖難後不屈，死。

監察御史韓公

韓郁未詳何許人。建文中上書言：諸王親則太祖遺體貴則康皇帝手足尊則陛下叔父使二帝在天之靈子孫爲天子而弟與子遭殘戮其心安乎。此皆監儒偏見病藩封太重疑慮太深至此夫曆亡齒寒人人自危周王旣廢湘王自焚代府被推而齊臣又告王反矣爲計者必曰兵不舉則禍必加是朝廷執政激之使然。燕舉兵兩月矣前後調兵不下五十餘萬而一矢無獲謂之國有謀臣可乎。經營

已久軍興輒乏徒使中原無辜赤子困于轉輸九重之憂方深而出入帷幄與國事者方且洋洋自得彼其勸陛下必削藩國者果何心哉諺曰親者割之不斷踈者續之不堅陛下不察不待十年悔無及矣幸少垂洞鑑釋代王之囚封湘王之墓還周王于京師迎楚蜀爲周公俾其各命世子持書勸燕罷兵守藩宗社幸甚不聽郁未詳其所終

李禿翁曰此或爲補鍋匠或爲河西傭或爲轉輪藏頂之二十餘人嘍嘍有聲者皆未可知也大臣



生事禍國一至此哉。絕可悲。嘆黃子澄齊太輩。雖寸斬亦終不足以謝天下矣。

監察御史魯公

魯鳳韶，廬陵人。洪武末年進士，建文初爲御史，會藩王入覲，馳皇道入，且不拜鳳韶侍班，言殿上宜展君臣之禮，宮中乃叙叔姪之倫，由皇道不拜，太不敬。上曰：「至親勿問。」靖難兵起，鳳韶使北平，請罷兵，不報。靖難後，召復御史，不至，尋加侍郎，召又不至，刺血書襟，上曰：「予生廬陵，忠節之鄉，素負立朝骨鯁之腸，讀書而登進士第，仕宦而至繡衣郎，旣一歿之，得宜可。以含笑於地下，而不愧吾文天祥屬妻李并子公望。」

曰我死勿易衣遂自殺時年二十九李亦自經死

監祭御史王公

御史王彬字文質，交州東平人。洪武中進士，起家爲御史，巡江淮。靖難兵至，彬與指揮崇剛共守揚州。指揮王禮欲舉城降，彬與剛知之，執禮及其黨繫獄。彬外禦內防，七日不解甲，有力士能舉千斤，彬常以自隨。靖難兵飛書城中，有縛王御史降者，官三品，左右憚力士莫敢縛。禮弟宗厚賂力士，誘其子出，會彬解甲浴，遂爲千戶。徐政、張勝所縛，昇至城上，投靖難兵中，不屈死。政遂出禮等于獄，與江都知縣張本開

城門出降正德中揚州祀彬名宦

董葉魏甘四御史

御史董鏞或作庸不知始所自起亦不知何許人建文時諸御史有志節效忠者時時會鏞所將校懷貳不力戰者輒露章劾之靖難後爲衆所持論歿家徙戍邊

御史葉希賢或曰浙東人或曰起家鄉薦入臺侃侃自負建文時屢疏言兵事又嘗劾耿李二大將失律喪師靖難後坐逆黨歿

御史魏冕吉安永豐人勁直有才氣靖難兵至有約

開門者，寃率同僚十八人，卽殿前毆之，幾死。會輟朝，寃及鄒瑾大呼請速加誅，明日宮中火起，寃自盡。法官請追罪夷其族。

御史甘霖，懷寧人。洪武丁卯鄉薦，爲御史。剛介敢言，中臺推重之。靖難後，被執求死，從容受戮。子孫相戒，不復求仕。正德中，知府胡纘宗祀之鄉賢祠。

御史王公鄭公

王度字子中，廣東歸善人。以明經薦，爲山東道監察御史。卓有風裁，疏十餘上，多見采行。靖難時，李景隆累敗，退保濟寧。以盛庸代度，密陳便宜。是以有東昌之捷，徵景隆還，不誅，反用事。忌盛庸與度，度稍踈斥。二年夏，靖難兵益急，度請募兵，未幾，遂有小河之捷。勅度勞軍徐州，比還，鳳陽不守，方孝孺與度書相誓以歿。四年秋七月，謫戍賀州，坐語不遜，夷其族。年四十七。



鄭公智字叔貞台之寧海人力學好古工文辭方孝  
孺薦之蜀獻王召至成都王與語經史論詞稅王大  
說建文初侍孝孺至京尋舉賢良爲監察御史靖難  
後坐方黨論死

御史尹公主事巨公

尹昌隆字彥謙，太和人。洪武十八年進士，授翰林修撰，改監察御史。建文卽位，早朝晏，昌隆諫曰：「太祖高皇帝雞鳴而起，昧爽而朝，未嘗日出以臨百官，百官于是乎戒懼。今陛下嗣守大業，固宜追繩祖武，未明求衣，乃溺于宴安，日刻甚晏，猶未臨朝，羣臣宿衛疲伺，廢業上下懈弛，非社稷福也。」建文曰：「昌隆言中朕過，禮部可卽頒示天下，靖難兵旣南，昌隆上言，今事勢日去，而北來章奏，每以周公輔成王爲言，不

若罷兵息戰許其入朝彼既欲申大義于天下不應便相違戾設或有蹉便當讓位不失守藩若沉吟不斷禍至無日進退失據雖欲求爲冊徒布衣不可得矣靖難後昌隆名在奸黨驅出就戮昌隆大呼曰臣曾上書勸讓位奏牘尚在可覆也于是檢奏有之上曰火燒頭早從此言南北生靈受禍不若是酷朕亦無此勞苦遂貸昌隆歿亡何以爲北平按察知事行戶部主事改禮部尚書呂震喜諂忌昌隆誣昌隆與谷庶人通謀遂論歿沒其家後震病時時呼號乞

解曰尹相尹相妻子問故曰昌隆守欲殺我震竟死  
監察御史巨敬平涼人伉直敢言建文中爲戶部主  
事靖難後被逮責問不屈死夷其族

按察使王公

王良字天性河南祥符人歷官刑部左侍郎建文二年問燕國人罪從末減左遷浙江按察使文皇卽位詔召良良集臬司諸印私第躊躇未能決妻問故曰我分應歿未知所以處汝耳妻曰我何難君爲男子乃爲婦人謀乎遂餽良食置其子池傍自投池歿良殮妻畢自列薪于戶寫遺囑付家人令妾抱幼子往匿某僉事所遂舉火闔室自焚歿事聞上曰歿本良分也朝廷印信良不得輒毀良毀印不得無罪

徙其家于邊台人陳璠私識良歿事每談及流涕沾襟正德戊寅浙江按察使梁材提學副使劉瑞改公署東水鑑亭爲祠祀良

李禿翁曰良以問燕人罪從末減被謫則其人已大有學識可任用矣文皇詔召蓋欲用之也良與夫人乃從容以歿夫人餽食與良先良而歿良殮祭夫人囑遣幼子畢然後歿雖建文印信亦不肯留一類以與文皇嗚呼烈哉

按察副使程公

程本立系出伊川徙崇德與海鹽沈壽康友善洪武九年除秦府引禮舍人十三年補周府引禮官從王之國二十年春進長史從王來朝被累謫雲南馬龍他郎甸長官司吏目留家大梁從一僕去會歿可伐煽誘百夷爲逆本立單騎入夷巢諭以利害諸酋落感說是冬諸夷復變帥潘沐英張統屬本立行縣典兵事且撫且禦本立不避險難山行野宿自楚雄姚安抵大理永昌鶴慶麗江往來綏輯民夷稍安二十

五年英卒，本立爲文祭英，宗人重本立，請本立撰碑記述英功德。三十一年，奏計入京，應天府尹向寶、翰林學士董倫薦本立學行政事，宜留徵入翰林，充纂修官。修太祖實錄，建文三年實錄成，改江西按察副使。未至江西，聞靖難兵入，自縊歿。後百三十年，福建布政使吳昂刻其巽隱集于閩，壽康洪武庚戌旌表孝子，知縣王文禮敬之。



僉事胡公林公

按察僉事胡子義刑部侍郎子昭弟也薦辟爲威遠訓導歷蜀府典寶山東按察僉事聞兄歿辟世丹稜蜀獻王聞而憐之有二子竟棄去莫知所終

按察僉事林嘉猷台之寧海人師同邑王琦琦坐累徙雲南嘉猷徒步千里追別又行六千里至漢中師方孝孺孝孺得嘉猷鄭叔貞喜曰匡我者二子也洪武二十九年以儒士校文四川累遷陝西按察僉事靖難後坐方黨逮至京建文四年九月丁亥歿

叅政鄭公

鄭居貞徽州人。洪武中以明經舉授鞏昌通判。陞禮部郎中。建文時爲河南叅政。永樂初坐方黨。歿于南京。方孝孺之爲漢中教授也。居貞常以詩送之。曰。翩翻紫鳳雛。羽翮備五彩。徘徊千仞翔。餘音播江海。於焉覽德輝。濟濟鏘環佩。天門何差峩。羣仙久相待。晨沐晞朝陽。夜息飲沆瀣。如何復西飛。去去秦關外。岐山諒匪遙。喙食良自愛。終當巢阿閣。庶以鳴昭代。

續藏書卷六終